

欽定剿平粵匪方略

欽定勦平粵匪方略卷一百七十 丁巳年

二月十一日 癸巳 福濟奏定三鄭魁士奏

舊本

一邑係八省通衢必當迅圖克復李元華約會  
諸軍上年十二月初九日自潛啟行分爲五路  
進勦該逆聞信於新東門老東門連夜紮定五  
營意圖迎拒我軍先發制人將新東門老東門  
速用火攻賊衆驚潰紛紛逃竄計斬擒數百名

又速催千總鄔定魁等各督兵勇分攻西南北  
三門署太湖縣知縣蔡鏐等亦同時趕到奮力  
環擊勇氣百倍賊衆驚亂各思逃生先是李元  
華密謀內應舉火爲號鄔定魁等望見城內火  
光奮勇爭先緣城搶入該逆不知所措東竄西  
逃當經我軍搜捕殆盡共斃賊三千七八百名  
奪獲刀矛槍礮旗幟器械大小三千五百餘件

生擒三百十九名內有僞監軍潘姓一名僞典  
硝宋姓一名僞將軍五名遂於十二月初十日  
將太湖縣城克復詎安慶悍賊探知太湖緊急  
乘潛山空虛擁衆直撲李元華迅卽折回二十  
九日逆衆四千餘人自宿松楓香驛來撲各營  
李元華飛調各勇由南北兩路抄殺生擒十七  
名斃賊三百餘人七年元旦宿松之賊一由楓

香驛進一由水磨嶺進撲我西營望江之賊由  
棋盤寺進撲我南營約有萬餘各營員弁奮力  
接戰生擒賊首三十八名適蔡鏐之勇又由北  
路抄來會合攻擊斃賊一千餘名乃小孤山援  
賊一齊趕到初四日糾黨二萬復來侵擾李元  
華等四面環攻生擒三十一名斃賊二千餘名  
初五日該逆收合餘燼於西南兩路紮營三座

我軍急追奮勦斃賊不下三千新築賊營踏爲平地初八日賊以三千人繞至西營後面以二千人擁至南營前面各勇分投夾勦立即逐回該匪復與湖北來賊聚集一處卽依民房紮立營盤九座初九日大股來犯馬賊數百人排立山頭步賊四千人自西面山岡壓下復以千餘賊在南路竹林一帶牽掣我軍當飭各營分

兩路出戰一繞賊前一抄賊後乘該逆站立未  
定一擁上前連斃真賊多名餘悉退踞山麓李  
元華立帶精銳一軍橫衝賊陣截爲兩段面面  
兜殺斃賊三千餘名生擒七十八名九營次第  
俱成灰燼餘賊或回望江或回宿松或由小孤  
山遁去臣等查太湖縣在萬山之中與楚接壤  
我軍深入賊卽廣集外援彼逸我勞奏功非易

此次李元華一鼓登城力戰卻退一月之中斃  
賊一萬餘人逆鋒大挫該員已於克復無爲潛  
山案內保升道員並

賞戴花翎此次擬請

賞加按察使銜千總卹定魁等並請分別獎勵其餘出  
力員弁紳董容臣等查明彙案請獎奏入

上諭內閣曰安徽太湖縣城久被賊踞上年十二月初



九日經候補知府李元華等統帶隊伍分攻各門斃賊一千七八百名生擒一百餘名將縣城克復該逆復敢糾衆攻撲官軍營盤疊經李元華調派各路兵勇連日擊退先後斃賊四千餘名並將南路竹林一帶賊營盡行燒燬復斃賊三千餘名辦理尙爲得手自應先加獎勵候選知府保升道員李元華著賞加按察使銜藍翎千總鄔定魁千總鄭海鼇均著免補

本班以守備儘先拔補鄔定魁並著賞換花翎鄭海  
鰲並賞戴花翎武舉李登雲著以千總拔補並賞戴  
藍翎署太湖縣事候補直隸州州判蔡鏐著補授太  
湖縣知縣訓導姚繼韶著以知縣不論雙單月遇缺  
卽選其餘在事出力員弁紳董並著福濟等查明彙  
案請獎

上又諭內閣曰安徽太湖縣久爲逆賊竄擾現經官兵

克復該縣紳民犒師助剿深明大義亟應渥沛恩施  
以示嘉獎所有太湖縣咸豐四五年正雜各項錢  
糧及以前積欠著一併豁免

十二日甲午官文胡林翼奏言正月二十一二等

日宜昌匪衆竄入宜都縣屬之白羊港經馬天  
貴會同署宜都縣知縣吉臨率勇迎剿該匪敗  
退臣等以該匪烏合之衆亟應乘其無備智取

力攻以免負嵎因飛飭署宜昌總兵景輝等密授機宜迅速攻勦茲據景輝會同宜昌府知府阮福馳稟二十四日夜間調集弁兵練勇派署前營遊擊豐依本等攻西門東湖縣知縣王恩綸攻東門景輝與阮福圍攻南北二門該匪因黑夜未辨我軍虛實景輝令兵勇聲東擊西先於南門外縱火而潛令東西各路兵勇攀堞齊

登揮殺悍賊多名城內匪衆狂竄卽開北門突  
圍而出被殺及自相踐踏死者不可勝數當將  
郡城克復敗匪由東北當陽荆門山路逃竄臣  
等查宜昌乃川楚咽喉下接荊州重鎮而沙市  
又係商賈雲集之區必爲匪衆垂涎今仰蒙

聖主威福未及旬日迅卽克復聲威甚壯匪膽自寒是  
以荊郡及沙市一帶商民安堵如常洵堪仰紓

宸廛現在飛飭各軍於荆門當陽等屬將敗竄餘匪分  
道兜勦景輝等當匪徒入境未能實力攻勦咎  
無可辭惟於水陸各軍未到以前率團克復郡  
城尙屬愧奮應請

旨將景輝阮福王恩綸一併革職仍暫留宜郡地方搜  
捕餘匪奏入

上從之

十四日丙申官文奏言兩楚營務久經廢弛而楚

北尤甚亟須力圖整頓伏思練兵必先擇將將  
強則兵自精查實缺候補揀發保升各員其中  
戰守兼優者固不乏人而庸懦無能者亦復不  
少自當徹底考覈分別去留俟軍務大定卽親  
悉南北省按營查閱務使一兵得一兵之用以  
挽積習而肅戎行溯查二次收復武漢曾國藩

等由岳州水陸分三路進兵遂克兩城旋因水師失利礮船被焚賊遂無所畏忌前年臣與撫臣督師武漢維時鮎魚套賊檣林立勢甚猖獗經署提臣楊載福訓練水師遂成勁旅刻下九江賊船盡行焚燬此皆水師得力之成效也臣擬將兩楚有名無實各營水師分別裁汰挑選精銳總合一營改設鎮協一員專司統率扼要



駐紮以一事權平時分巡會哨有警分撥勦防  
上達洞庭下通江皖長江天塹據有其險庶幾  
鞏固無虞俟九江下游一律肅清臣會同提臣  
撫臣妥爲計議酌定章程再行請

旨奏入

上嘉之

同日德興阿翁同書奏言上年四月閒欽奉

諭旨嚴汰文員飭令酌留實在可用者數人以資差委  
查已革兩淮運司劉良駒樸誠練達在營四年  
熟習前後案卷原委是以派令總司文案該革  
員矢慎矢勤不辭勞瘁上年六月閒經 臣等奏  
奉

恩旨免其遣戍仍留揚州軍營效力該革員倍加奮勉  
承辦事件從無貽誤可否仰乞

天恩酌賞頂戴出自

逾格鴻慈奏入

上諭內閣曰已革兩淮鹽運使劉良駒辦理文案在營四年著賞給六品頂戴以示鼓勵

德興阿翁同書又奏言前直隸永平府休致知府史佩瑒欽奉

恩旨准其留於軍營差遣該員在營四年前後結案七

百餘起聽斷平允厯著辛勤年力正强才猷素裕當此軍興用人之際伏乞

天恩准以知府原官選用又已革知州銜甘泉縣知縣梁園棣在營當差四年委辦團練捐資帶勇尙有勤勞足錄可否准予開復原官奏入

上諭內閣曰休致直隸永平府知府史佩瑄在揚州軍營辦理發審事件已革知州銜甘泉縣知縣梁園棣

辦團帶勇均屬著有微勞史佩瑋著加恩賞戴花翎  
所請以原官歸選之處著不准行梁園棣著准其開  
復原官

十五日  
丁酉福濟奏言正月二十五日桐城賊匪

大股圍攻曹勝勇營盤秦定三督同梁勝章等  
帶領兵勇飛速馳援斬馘甚多另股又撲三十  
里鋪各營經余成蛟揮兵奮擊鄭魁士派兵趕

到合力衝突約斃賊數百名二十六日大股賊黨約有數萬由呂亭分三路來撲意圖安紮三營鄭魁士會同秦定三派隊迎勦分抄該逆紮營後路步軍攔截馬隊衝突立將逆營三座踏爲平地斃賊一千餘名至二十七日賊由呂亭西竄截我糧道二十八日賊匪一股由孔城出一股由呂亭出秦定三鄭魁士各帶兵勇在黃

栗岡一帶攻勦酣戰數時漸將賊衆圍抄斃賊數百名賊始退走乃二月初一等日安慶賊黨復行踵至不下四五萬人我軍糧道被賊阻遏秦定三鄭魁士麟瑞等會商事已危急決一死戰初一日午後出大隊迎勦該逆馬隊數千步隊不計其數層層圍裏愈殺愈多鄭魁士麟瑞振臂大呼喊聲雷震斃賊約一千餘名酉刻收

隊乃該逆甫退復合四路圍攻兵勇飢餓不支  
紛紛潰下鄭魁士麟瑞亦潰圍而出以賊必撲  
廬州由舒城星速折回已於初五日到廬臣查  
湖北甯國全股之賊竄入皖境桐營面面受敵  
實非無故潰散者可比惟臣疊商撤退該提鎮  
拘泥守營以致失利相應據實奏參請

旨定奪秦定三探聞已抵中梅河該處爲六安前路已



咨飭該提督扼守六安鄭魁士到廬後旋探得  
該逆已抵舒北是否繞越舒城抑舒城業已失  
陷容查明再行具奏惟廬州爲七省通衢中原  
關鍵兵勇僅餘二千餘人桐營潰兵趕緊招集  
恐難得力惟有請

旨由北路迅撥馬步精兵三四千名派員管帶來皖歸  
臣調遣俾資堵禦

福濟又奏言皖營防勦兼籌情形萬緊鄭魁士  
一人督帶恐精力難以周到查副都統麟瑞明  
白諳練接仗勇往應請

旨飭令麟瑞會同鄭魁士管帶各營兵勇均歸臣節制  
以期力遏賊氛奏入

上命軍機大臣傳諭福濟曰湖北甯國賊匪全股竄入  
皖境秦定三等以飢疲之兵勇處腹背受敵之地以

致力盡潰圍秦定三馳抵中梅河是否能過六安前路鄭魁士等雖已出圍折回廬郡而該逆已抵舒北舒城恐致失陷廬州存兵無多當此新挫之後恐軍威驟難復振朕心實深焦灼已諭桂良雙銳由直隸抽撥馬步官兵一千名並諭官文胡林翼於湖北得勝兵內酌派陸路兵一千名晏端書鄧紹良於甯國得勝兵內酌分一千名或數百名前往廬州均歸福

濟調遣並降旨將鄭魁士麟瑞各軍悉聽該撫節制  
該撫務當激勵將士協力固守探明何路緊急相機  
勦辦勿得以官兵新挫自墮銳氣致有疏虞

上又命軍機大臣傳諭桂良雙銳官文胡林翼晏端書  
鄧紹良曰現在廬州情形萬分喫緊必須添調兵力  
以資堵勦著桂良雙銳於景州駐紮之馬步官兵內  
抽撥一千名派員統帶卽日馳赴廬州前因無爲被

陷卽諭令官文等分兵一千名赴廬助剿現在湖北  
荆宜一帶如已就肅清卽著官文胡林翼迅派陸路  
官兵一千名馳往協剿並督飭水師沿江東下以分  
賊勢甯國已經收復皖南軍務較鬆兵力當可抽撥  
著晏端書鄧紹良迅速籌商就近撥兵一千名或數  
百名渡江繞道赴廬州軍營聽候福濟調遣

上諭內閣曰此股占踞桐城賊匪秦定三等圍攻未下

雖因賊衆糧乏尙非無故潰散究屬督勦不力福建  
提督秦定三提督銜安徽壽春鎮總兵鄭魁士均著  
摘去頂戴拔去花翎以示薄懲安徽巡撫福濟督辦  
無方亦屬咎有應得著交部議處仍著督同將弁激  
勵兵勇保全廬郡力圖進勦以贖前愆

上又諭內閣曰提督銜安徽壽春鎮總兵鄭魁士前有  
旨令會同英桂勦辦捻匪現在攻勦桐城失利業經

獲咎鄭魁士著毋庸會剿擒匪卽與副都統麟瑞管帶各營兵勇均歸福濟節制

十六日戊戌載增富森奏言探得該匪自宜昌逃

遁後已於正月二十七日攻陷遠安縣城復分股肆擾各路並據常恩等稟稱穀城興山保康房縣各境內股匪尙多是賊勢蔓延山谷不止遠安一股惟遠安山城有險可扼在荊州襄陽

宜昌荆門適中之地各相距二百餘里賊情詭  
譎莫測各郡防勦均不容稍疏其南竄一股已  
至當陽所屬消溪河經盧又熊帶勇迎擊其北  
竄一股已至南漳所屬茨河經唐協和帶勇迎  
擊其西竄大股在保康房縣所屬金斗坪等處  
經德恩等誅其逆首之子朱長幅等勦撫兼施  
翦滅淨盡惟東竄一股已至荆門州城外該州



帶兵勇堵截情形喫重祇因各軍相離過遠不能互相應援現由省城來荆之副都統巴揚阿帶馬步各隊遊擊張萬祿管帶川兵訓導鄒漢章管帶寶勇均先後抵荆臣等已與會合計議卽從荆門一帶相機進剿並知照常恩等統帶馬步兵勇及德恩所帶川勇分投前進四面兜捕使其無隙可乘如此合力會剿不難一鼓撲

滅新授荊州將軍綿洵已於二月初七日馳抵  
荊州一切防勦事宜臣當會商辦理奏入

上諭曰綿洵現已抵任諒已遵前旨出城防勦汝三人  
須和衷妥辦以保完善之區

十七日己亥署察哈爾都統穆隆阿副都統慶昫

奏言據兵部來咨安徽巡撫福濟奏請撥馬二  
千匹奉

旨著照所請惟不能如數撥解臣等擬在察哈爾商都太僕寺兩翼現存馬內調撥馬一千匹以備該處軍營補缺之用查商都太僕寺牧廠馬匹現在尚未歸廠當卽飛飭兩翼各總管親詣牧馬處所將各項馬匹調回齊至本廠地方臣等卽令委員出口會同總管等官務擇口輕膘壯可資軍營乘騎者詳細挑選按起查驗前進奏入

上諭內閣曰察哈爾調赴軍營馬匹既經該署都統等派員挑選著於所調一千匹外再行添備百餘匹一併管解來京聽候查驗再行撥赴軍營

二十日

壬寅

和春奏言青德州滿營原派兵一千

名由河南赴揚州助剿因陸續開除僅存八百名到廬隨臣剿賊已逾三年之久甚爲出力現在句容節次進攻槍礮有準殺賊亦極勇往洵

稱勁旅惟疊次出缺撤回刻下祇有六百餘名  
爲數過少查青州滿營存兵尙多茲與張國樑  
籌商擬添調精壯兵丁二百名飭令迅速前來  
隨剿以資得力奏入

上命軍機大臣傳諭崇恩恩夔曰據和春奏山東青德  
州滿營官兵甚爲奮勇擬添調二百名赴營隨剿此  
時句容溧水節次進攻正當喫緊著崇恩恩夔卽於

青州滿洲營存兵內挑選精壯二百名飭令迅速前赴和春軍營以資調遣

和春又奏言臣上年行抵江南卽聞刑部候補郎中盧應翔盤踞江蘇物議沸騰嗣該員來營報效未准收錄詎總兵余萬清留於鎮江軍營飭令總理營務頗加信用該員或遇事把持或借端挾制居心狡詐實屬形同無賴明察暗訪

皇朝通志卷一百一十一  
眾口僉同總兵余萬清濫收劣員遽加信用並不申報希圖朦混且才具平庸難勝幫辦之任相應據實奏參請

旨將刑部候補郎中盧應翔卽行革職押令趕緊回籍不許在軍營逗留並請將余萬清撤去幫辦軍務仍留鎮江帶兵攻勦迅圖克復以贖前愆奏

入

上諭內閣曰刑部候補郎中盧應翔本係因案革職之員嗣在上海軍營著有微勞降旨開復乃不知愧奮輒敢遇事把持藉端挾制實屬形同無賴盧應翔著卽革職押令回籍不准逗留幫辦軍務總兵余萬清於此等劣員濫行收用並派總理營務實屬糊塗著撤去幫辦軍務仍留鎮江帶兵攻勦以示薄懲

和春又奏言查句容縣城爲金陵往來要路急



應上緊攻勦正月二十六日卽飭張國樑調隊  
攻擊派副將王浚等帶勇分路進攻相機截殺  
張國樑統領各軍往來策應臣和春居中調度  
城外賊營約出賊四五千名分途來迎兵勇奮  
力前驅該逆拌死抗拒都司程翔蛟由中路衝  
出立斃執旗悍賊數名賊勢稍卻我軍一擁直  
前刺死賊匪無算趕至西門餘賊敗逃入城未

幾東門復出賊二三千人橫衝而來張國樑親帶官兵分路迎擊逆匪愈來愈多我軍愈殺愈猛張國樑策馬衝入賊隊臣和春帶領馬隊左右分抄連斃賊首數名內有黃衣騎馬賊頭一名被程翔蛟立斬馬下我軍一齊追擊該逆槍礮甚密程翔蛟槍至外濠被礮子打入腹內登時陣亡是日鏖戰數時之久約共斃賊七八百

名二月初四日賊營突出四五千人分股來撲張國樑親督官兵由尹家邊進勦先行接仗立斃馬步賊十數名餘賊驚潰飛奔趕至濠邊落水死者不少正得手間忽南土梁後突出數千人飛奔來援張國樑等率領各軍兩面夾擊約斃賊四五百名砍取首級一百十五顆奪獲軍械百餘件臣仍飭設法攻勦迅圖克復都司程

翔蛟臨陣捐軀實堪憫惜應請

旨飭部從優議卹奏入

上從之

和春又奏言正月二十六日鎮江南門及南水關虎頭山等處各出賊一二千人分路來撲經副都統巴棟阿等帶領兵勇分途抄擊奮力攻剿斃賊無算該逆仍復抗拒經遊擊王夢熊帶

兵由甘棠橋分路抄來逆匪潰敗適金山突出  
賊千餘人希圖援應周士法等飭令水勇登岸  
兜剿約斃賊四百餘名其溧水防軍探得柘塘  
來賊七八千人已抵鄔山築立營壘卽派參將  
張玉良等分三路進攻營總托克通阿等帶領  
馬隊於各路策應逆匪見我軍大至卽分五股  
來迎兵勇分途攻擊斃賊多名托克通阿等從

山後抄出截其歸路大聲吶喊賊衆驚亂旋即  
敗潰我軍齊力追勦一擁而進盡力殲殺卽將  
賊營五座毀爲平地城內之賊於西門突出千  
餘人來撲經米興朝迎勦虎坤元由南路抄擊  
馬騰霄等從兩旁衝殺先後共約斃賊二百餘  
名二十五日派令各營兵勇圍攻溧城及北門  
外賊壘該逆突出千餘人前來迎敵李定太等

衝入賊隊立刺悍賊二名其勢大潰兵勇追殺斃賊一百餘名二十七日西北兩門各出賊二千餘名分撲各營米興朝等馳往迎勦斃賊甚衆周天培等從旁抄入槍斃騎馬賊二名賊勢漸卻兵勇繼進刀矛並刺逆匪紛紛倒地餘俱飛敗入城旋探得高陽橋觀音寺一帶賊匪沿路裹脅不下四五千人復至鄔山築壘冀圖援

應當飭李定太等帶領馬步隊馳抵該處奮力  
擊勦斃賊無數二十八日五鼓督同虎坤元等  
進攻鄔山賊壘該逆分股來迎虎坤元等策馬  
衝突兵勇一鼓作氣馬隊從旁截殺逆屍枕藉  
賊又從西門突出千餘人經米興朝連開大礮  
各兵左右分抄三面夾擊約共斃賊三百餘名  
砍取首級二十一顆奪獲軍械九十餘件餘賊



奔敗入城現仍飭令趕緊攻勦以期迅復鎮江  
溧水兩城

和春又奏言接安徽撫臣福濟咨請酌撥官兵  
前往廬江等處援勦臣查句容雖節次進攻頗  
有斬擒而逆勢尙衆溧水亦未克復攻勦正當  
喫緊但皖省賊勢猖獗自應設法抽撥馳往援  
應當與張國樑籌商揀派密雲兵三百餘名吉

聞

林五起兵二百餘名遊兵營兵三百餘名共官兵八百餘名飭令協領玉崑等管帶馳往助剿奏八均報

同日

上諭內閣曰前因向榮督兵東下該營無文員襄辦是以派令前任鹽運使彭玉雯幫辦軍務辦理糧臺四

載以來該運使並不與聞軍務至糧臺是其專責乃  
於應行報部之款疊經戶部查催迄今延不造報實  
屬疲玩所有前派彭玉雯幫辦軍務之處著卽撤銷  
現在江南糧臺業經按察使楊能格接辦此後收支  
款項著楊能格遵照戶部奏定章程依限造報毋許  
遲誤

二十二日

甲辰

綿洵載增富森奏言查遠安賊匪

於本月初六日全竄荆門該州督勇迎敵未能  
抵禦遂致州城失陷該匪卽乘勢南竄適荆州  
後起馬步各隊兼程而進前隊直過建陽迎頭  
向擊訓導鄒漢章等分帶南勇亦進攻荆門之  
東南守備胡舉高等帶川勇進攻荆門之西南  
該匪前後受敵立卽折回兵勇追至城下該州  
文武各員會同剿擊設伏圍攻賊卽於初九日

潛開北門遁去各軍分投追殺一面攻入城內  
將餘匪全數殺盡臣等伏思該匪竄陷荆門距  
荆祇百餘里幸而後起馬步各隊及南勇等先  
後分投趕到使賊首尾不能兼顧棄城遁去荆  
州復獲安全現在巴揚阿等已由荆門分起前  
進該匪又至宜城若襄陽防勦果嚴將來回竄  
旁竄均未可料查南漳沙洋皆爲旁竄之路其

南漳一帶已有鹽道常恩等之軍抄出截擊其  
沙洋襄河已派遊擊張萬祿等帶領川兵前往  
堵截惟山徑湖汊通荆沙之處極多臣綿洵已  
駐兵荊州北界要隘自當悉心調度隨時與載  
增富森互相知照務使城內城外一體防範嚴  
密以期仰慰

聖懷奏入

上諭內閣曰遠安逆匪全竄荆門遂致州城失陷守備  
胡舉高等分帶川勇南勇進攻該逆前後受敵潛開  
北門遁去收復荆門州城著該將軍等卽飭巴揚阿  
等乘勢追剿盡殲醜類並分兵堵截毋令旁竄荆門  
州文武各員有無先期逃避情事著官文胡林翼會  
同綿洵等確查具奏

二十五日  
丁未官文胡林翼奏言二月初二日宿

松匪衆三路上竄一由亭前驛南一由亭前驛  
北一由獨山鎮竄及魏家涼亭各距黃梅縣城  
數十里臣都興阿先期商派營總巴依爾呼蘭  
等各率兵勇紳團分路迎勦斃賊數百餘逆逃  
竄桂家畝一帶據生擒賊目僉供宿松僞擣天  
侯陳玉城等糾集太湖逆黨四萬餘將踞黃梅  
而竄蘄州等語署黃梅縣知縣覃瀚元密商都



興阿等將計就計以空城誘賊入內而於要隘設伏擊之初三日逆衆由馬尾山桂家畝王家河三路上犯各萬餘人見城內空虛長驅直入各路騎馬賊不下千餘亦馳驟而至都興阿分撥馬隊槍箭齊施王國才等分撥步軍刀矛並刺立斃悍賊多名馬尾山桂家畝兩路之賊先敗王家河賊衆亦潰初四日覃瀚元派紳勇伏

於城內翼長多隆阿帶隊由城南進擊營總倭  
克錦依由城北截勦王國才鮑超方映川由城  
西一帶分路進兵城內老賊數千驍勇異常死  
力拒敵復有獨山鎮股賊五六千抄出我軍步  
隊之後勢將不支適巴依爾呼蘭馬隊趕到縱  
橫衝擊賊勢披靡立斬悍賊數百名餘逆棄城  
逃竄我軍分投截擊越嶺追勦共斃賊四千餘

名奪獲馬羸數百匹該逆本欲援應九江直踞  
黃梅乃官軍以少擊衆大獲全勝下游逆衆自  
必聞風膽落臣等現仍嚴密扼守一面會合水  
陸各軍環攻小池口及九江郡城設計圍困絕  
其應援期於迅速得手奏入

上諭內閣曰此次攻剿援賊獲勝出力員弁紳勇著准  
其彙案保奏候朕施恩仍著官文胡林翼督飭在事

文武水陸環攻務將小池口及九江郡城之賊趕緊  
攻克毋稍延緩

二十六日 戊申 福濟鄭魁士奏言據署六安州知

州金寶樹等稟稱該員等聞舒城被陷卽募鄉  
勇千名飭令勇目呂成衡等管帶前往舒六交  
界之白洋鋪扼要嚴防不意未及安營已被賊  
匪衝散幸施家橋團練齊心截擊該逆尙未敢

狂撲該員等遂於二月初八日隨同秦定三出城躡築營盤以備駐守而賊已驟至二十里鋪秦定三所帶各勇器械不全惟金寶樹等帶領練勇向東南奮擊殲斃騎馬賊目五名該逆恃衆衝突蠡擁堦圍正在鏖戰閒賊忽分爲三股抄至後路突見西北兩門火起賊已闌進六安州城該員等力不能援暫至木廠鋪馬頭集等

處整團再圖攻復臣等查六安至臨淮一水可  
達儻被乘虛盤踞則淮河鎖鑰盡失軍餉無路  
可通恐廬營困在垓心不戰自潰且捻匪在穎  
霍一帶紛紛肆擾互相勾結勢所必然非力遏  
正陽關更有北竄之慮臣福濟已飛札署廬鳳  
道金光飭堅守正陽嚴密堵禦惟兵勇無多萬  
難支持應請

旨飛飭勝保迅帶大隊馳赴正陽會合迎截方可全大局而免蔓延署六安州知州金寶樹六安營參將喜瀛及被賊竄過之署舒城縣知縣梅鴻儒均有守土之責相應請

旨革職令其帶罪克復城池以觀後效奏入

上命軍機大臣傳諭福濟英桂勝保曰正陽關爲北路要衝雖署廬鳳道金光飭帶兵堅守而爲數無多自

應撥兵赴援惟現在潁州捻匪甚熾固始縣城被圍  
正陽一路恐勝保未能兼顧然於無可籌撥之中仍  
應酌撥數百名馳援以顧大局亳州一帶捻匪南竄  
該處有朱連泰等沿途攻勦或卽令袁甲三酌帶兵  
勇前赴正陽而另派妥員會同朱連泰等攻鄧家園  
等處零匪著英桂勝保妥爲籌畫趕緊布置如亳州  
緊要袁甲三不能前往另有妥員可派亦著迅速奏



明辦理萬不可稍有遲延致誤大局福濟惟當力保  
廬州俟和春派往之密雲等兵邵燦等派往之關保  
馬隊及皖南酌撥官兵陸續到廬卽可進圖規復

上諭內閣曰逆賊於攻撲舒城後復敢竄擾六安州地  
方闌入州城著福濟鄭魁士迅圖克復署六安州知  
州金寶樹參將喜瀛及被賊竄過之舒城縣知縣梅  
鴻儒未能力籌堵禦均著革職責令帶罪自效

福濟鄭魁士又奏言疊據音德布函稱初八日賊衆自芝麻河黃泥壩赤泥壩卜家集等處分股圍撲列陣十餘里該總兵督飭官兵分投迎擊斃賊二三百名初九日江南來賊愈多水陸相望東南北三面分撲我軍極力抵禦奮勇擊刺斃賊數十名該逆愈聚愈衆在金家樓許家油坊高家油坊等處步步爲營四面圍裹我軍

聞

晝夜苦戰不得少休適和州知州陳麒昌帶勇  
來援逆勢稍斂臣查該逆大股圍困營盤勢甚  
兇狠此次雖經陳麒昌援勦解圍而音德布兵  
力甚單恐難卽時擊退以保孤軍臣等再當設  
法相機進勦奏入報

二十七日己酉  
駱秉章奏言查兵部右侍郎曾國

藩之父曾麟書於二月初四日在籍病故例應  
丁憂曾國藩現在江西辦理軍務其弟儘先選  
用同知曾國華現帶勇攻剿瑞州同知銜優貢  
生曾國荃現帶勇攻剿吉安均應丁憂惟軍務  
正值喫緊之時應否令該員等回籍守制之處  
伏乞

訓示施行奏入

上命軍機大臣傳諭福興文俊曰據駱秉章奏曾國藩之父曾麟書在籍病故已有旨令曾國藩回籍治喪所帶湖南兵勇著暫交其弟曾國華統帶俟曾國藩銷假再令曾國華回籍著福興文俊傳旨諭知曾國藩等遵行現在江西軍務正當喫緊曾國華尙在瑞州卽著飭令回省統帶曾國藩一軍該員屢著戰功諒能得力福興想已到省與文俊等面商勦辦機宜

撫建一帶賊勢鴟張福興是否仍由廣信前往攻剿  
其九江賊匪經湖北水師東下聲勢甚壯自可卽日  
攻克著福濟會同文俊通籌大局妥爲布置並將現  
在各路情形奏報以慰廑念

上諭內閣曰兵部侍郎曾國藩之父曾麟書在籍病故  
該侍郎現在江西督師軍務正在喫緊古人墨經從  
戎原可奪情惟念該侍郎素性拘謹前因母喪未終

授以官職具摺力辭今丁父憂若不令其回籍奔喪  
非所以遂孝思曾國藩著賞假三箇月回籍治喪並  
賞銀四百兩經理喪事俟假滿後再赴江西督辦軍  
務

三十日 壬子 英桂奏言據南陽鎮邱聯恩函稱楚

匪由均州以北竄至李官橋地方該鎮督兵迎  
剿斃賊多名忽左右伏賊突出圍裏鏖戰數時

未能得手當於鄧州之半扎店駐紮堵截本月十五日該鎮督兵進徧文曲集該匪聞風西竄現浙川廳屬之土地嶺等處已被該匪竄擾內鄉縣境亦有匪蹤趕卽抽調本標兵丁雇募壯勇實力勦辦臣查內鄉浙川距南陽郡城僅百餘里堵勦萬分緊要該鎮所帶兵勇不滿二千實爲單薄臣營兵力又屬無多現在救援光固



不敷分撥查武漢克復以後湖北軍情已鬆可  
否仰懇

天恩俯念豫省東南兩路勦匪緊要

飭下湖廣督臣酌撥吉林黑龍江馬隊數百名迅速前  
來臣營協勦並請

飭令楚陝統兵鎮將移軍西向繞山賊前與邱聯恩會  
合堵勦以杜西竄奏入

上命軍機大臣傳諭官文胡林翼曰據英桂奏楚匪擾  
及豫疆請飭湖北酌調馬隊協剿此股匪徒竄至均  
房穀城等處總未大受懲創以致日久蔓延亟應厚  
集兵力剋日掃除湖北馬隊無多前已據官文奏明  
未便調撥自係實情卽著飭令派出之巴揚阿等馬  
步各隊將本境匪徒實力搜捕繞出賊前與邱聯恩  
合力兜擊以杜該匪西竄之路前任鹽法道常恩業

經胡林翼奏叅革職所統兵勇是否另派妥員接管  
並著飭令進剿毋許玩延陝西副將龍澤厚等統帶  
各軍業經譚廷襄奏明於克復竹山縣城後仍令跟  
蹤追剿此項官軍著官文等查明現在何處一併嚴  
飭會勦儻畏蒞不能用命卽行嚴叅懲辦